

«Chapitel nair» en l'istorgia grischuna vegn perscrutà

■ (rtr) L'Archiv cultural da dunnas perscrutescha l'istorgia d'uffants, dunnas ed umens plazzads. Els èn vegnids plazzads tar famiglias, instituziun u schizunt en praschun. Els èn pertutgads da mesiras repressivas per motivs educativs, morals u finanzials. Il chantun Grischun era fin ils onns 1960 fitg pover e fin oz èn las consequenzas per la populaziun betg perscrutadas. Quai duai sa midar.

Perscrutaziun dals destins da pertugads

Fin il 1981 èn persunas, savens flaivels u povers, vegnidas plazzadas cun mesiras repressivas. Dunnas betg maridadas ch'èn vegnidas en speranza han stuì ir en praschun, uffants èn vegnids plazzads en autras famiglias. La manadra da l'Archiv cultural da dunnas, *Silke Redolfi*, less perscrutar ils destins dals pertugads. 30 intervistas èn planisadas cun pertugads e cun autoritads involvidas.

Collavuraziun cun igl Archiv chantunal Grischun

L'Archiv cultural da dunnas vul dar als pertugads ina vusch. Els n'èn dentant betg ils sulets che fan perscrutaziuns davart il tema. Era l'Archiv chantunal dal Grischun s'occupa dals plazzads, però cun in auter focus. En ils documents vegn chattà infurmaziuns davart l'agir da las autoritads fin 1981. Quels stattan er a disposiziun per retschertgas da pertugads. Cunquai ch'i sa tracta d'in mandat dal chantun ha l'archiv chantunal in budget. Quel manca dentant a l'Archiv cultural da dunnas. Il chantun discutescha dentant davart in sustegn finanziel per lur perscrutaziun.

Occurrenzas per animar pertugads

Per far attent sin la perscrutaziun datti adina puspè occurrenzas. Tranter auter quintan pertugads lur istorgia da vita. Uschia duain auters pertugads vegnir encuraschads da discurren davart lur destin en la publicitad e da tematisar quel chapitel nair da la istorgia grischuna.



Mathis Treppa, Sandra Locher e Silke Redolfi han preschentà il project «Versorgt» che vegn realisà da l'Archiv cultural da dunnas.